

衢州文獻集成

「史部」

第
44
冊

國家圖書館出版社
National Library of China Publishing House

衢州文獻集成

黃靈庚 諸葛慧艷

主編

〔史部〕

第
44
冊

國家圖書館出版社

鄭永禧纂

「民國」衢縣志三十卷
(卷十八至二十四)

民國二十五年(1936)鉛印本

第四冊目錄

〔民國〕衢縣志三十卷（卷十八至二十四）

鄭永禧纂

民國二十五年（1936）鉛印本

.....

衢縣志卷十八

碑碣志三

分二類

廟


祠

衢縣志

卷十八 碑碣志三 目次

一

浙江衢縣五縣



衢縣志卷十八

縣人 鄭永禧 纂

碑碣志三

神廟生祠類

元奉定侍郎鄧文原撰郡城隍廟記

依嘉靖府志錄

衢故會稽太末地閩粵之會仙靈所宅岑蔚相望泰定乙丑監郡赫斯以書抵予曰郡有峯其形若龜顙首南面郡治踞其背直南爲廟以祀城隍羣山迴互起伏因爲雉堞以壯城守邦人具瞻神茲烜著前是宋紹定間寇至官軍欲勦平之若有風馬雲軍犄角來助寇以奔潰水旱疾厲禱焉咸格輪奐之工自紹興乾道淳熙荐加完繕廟號崇褒則淳祐之十年也至元丙子城居燬於兵惟廟獨存越六年盜發屬邑薄城下勢張甚神效靈如紹定時傳言神聰明正直而一依人而行信有徵哉赫斯奉命來守是邦祇謁祠下周視棟宇撓敗弗治丹堊漫漶謀撤而新之一夕夢與神

坐若訊鞠者覺得西安縣方氏死冤狀釋逮繫者十一人其經度締構則自敝殿層樓重門修廡以次具美夜復夢造神所有遺幣在列黎旦見木偶屏榛翳間協如夢又北爲殿廡益增廣深蓋自甲子八月至明年五月落成赫斯首捐俸錢二千緡僚吏士民咨諏勸相庸工庀具悉由官給願公記之以垂示來者余惟古之祭也各有等威禮不相侵越故五岳視三公四瀆視諸侯諸侯祀名山大川之在其地者自秦廢封建而郡縣後世郡祀城隍豈亦與二千石均牧民之寄歟二千石佐天子承流而宣化神司陰陽捍患而禦菑幽明分殊而理一今神嘉惠於衢久侯其益厲精白脩政教以子衢之民然後神人之道兩盡則夫廟祀之建豈直矜壯麗資美觀而已哉侯曰公之言覈而理請書而鐫諸石是爲記

按此記見浙江通志引崇禎府志元侍郎鄧文原撰文多節錄陳姚兩志所載亦有脫誤茲補正之

明弘治教諭胡昱撰城隍廟記

依嘉靖府志錄

城隍衢郡之高墟所以捍外衛內立廟而祀之理固宜也古者設險以守國因山爲城因川爲隍若平地則築城浚隍以擬山川之險禦寇敵保人民其功大矣天下郡邑之祀城隍禮所謂有功於民則祀之者歟我太祖高皇帝臨御之三年卽正其名曰某府城隍之神頒其廟制革其封號一洗前代之陋矣元至正初總管張士俊營繕城隍廟宇滋久傾圯洪武辛未張士良守衢承制以建者湫隘弗稱糝彤陟剝寢入墮頽神無所依弘治庚戌太守張公俊治郡清慎勤勸令行惠施人被其澤尤深凋瘵困憊庶幾其有瘳乎蓋公以慈祥豈弟化導其民而凡朔望祇神稽拜爲之倡暨同守蕭侯顯曾侯鐸通守岳侯鎮節推樊侯睿邑令廖侯鉉偕謁於廟偶見梁棟摧折鏤其前守職銜而公實與同姓慨茲舊廟之壞亦有定數乎仍命耆老徐景隆輩二十六人詢謀僉同募郡之富而仗義者樂助白金若干兩於是腐撓者易之湔漉者改之敝敗零落不可支者撤而更之諷日歲事鳩工飭材創建中庭四楹寢殿三間正殿五間殿有埏塑像泊階下結絲亭軒豁適美翼以左右十二司司有育胤

主殿之側各設東西祠容儀端嚴祠之偏各立齋沐所輪奐翬飛至於門楣柱礎廊
高明而塤塹廊廂庖湑加雕斲而峻麗甃城垣牆咸極完緻繁歟城隍宮寢而修葺
之恪遵聖度規模闔闢彩繪鮮耀南抱龜峯之嵯嶭西環葱嶺之嶙峋北旋浮石之
漣漪東接烏溪之澄澈蜿蟺扶輿嘉祲攸鍾足以妥神靈綏民福矣然廟貌聿新豈
非感應之理哉第見陰陽順其序風雨通其時百祥疊兆五穀豐穰庶官奉職萬民
咸和歲時祭祀禱祈以榮之克誠克敬可知也則神之陰翊默祐庥庇吾邦者寧有
既耶景隆相率請文以紀其歲月夫郡守者民之師帥所以承流宣化也而獄訟科
征簿書繭繷不與焉公興廢舉墜能行疑有脫字政教兼善可謂達治體知先務矣良二
千石之賢顧不偉哉春秋常事不書廟成宜書以傳後故詳記其事俾鑑諸貞珉庶
來世有所考焉凡捐貲之士及執事之人列於其陰

按此記亦僅見於通志碑碣列目碑文久佚茲採補之

漢宋勅封信安城隍誥文及明隆慶重建西安縣城隍廟記

在廟門左

漢勅封信安城隍仁祐伯誥

昔者聖王之制祀禮也有功於民則祀之爾信安城隍呂應徵聰明正直民所馮依凡請禱而祈年悉陰孚而默佑茲特封爾爲仁祐伯爰遵列爵用答神休尙惟冥漠之中歆此殊常之渥

漢勅封信安城隍仁祐伯妻裴氏誥

神有功於民已開冥祐婦從夫之爵亦有邦儀爰卽典常用褒淑德爾信安城隍厥配裴氏昭明淑慎相夫理幽如綸如綍永稱徽名茲特封爾爲仁祐夫人明增優恩益俾靈貺

五鳳三年四月

宋勅加封信安城隍廟仁祐伯誥

昔者聖王之制祀禮也有功於民則祀之衢州信安縣感應廟仁祐伯聰明正直民所馮依凡請禱而祈年悉陰孚而默祐爰增伯爵用答神休尙惟冥漠之中歆我殊

常之渥可特加封信安呂應徵爲積慶仁祐伯

宋勅加封伯配裴氏積慶仁祐夫人誥

神有功於民已開靈祐婦從夫之爵猶有邦儀爰卽典言用褒淑則衢州信安縣感

應廟靈惠茲德積慶仁祐伯妻裴氏稟姿柔順作配幽冥曰雨曰暘更資內助如綸

如綸永稱徽名俾新袞此處原脫一字之華肇賜禕衣之寵益裨靈貺以稱優恩可特加封

積慶仁祐夫人

紹定元年十一月

日誥

右列上方

明隆慶西安縣重建城隍廟記

國朝主典神人兼用禮樂鬼神以爲治幽明之間各受其職所以克相上帝寵綏四

方者至矣乃若今日以上姚志刪西安城隍之神相傳以爲西漢五鳳丙寅邑人呂應徵

平生聰明正直得道爲神護國保民歷有顯應錫爵加諡爲積慶仁祐伯迄及千有

餘年未有改也獨廟祀未復今以其世考之縣治在秦爲太末縣屬會稽郡西漢晉之世改名信安屬東陽郡至隋煬帝時又以屬於婺州唐始立衢州治宋元因之所謂衢州路也我聖朝始陞爲府而以西安縣附焉由今觀之會稽東陽婺州皆與縣地相懸是以其先縣自爲廟以祀城隍後既卽縣建府則惟祀府城隍耳世有代變制有沿革氣數然也然幽明一理有郡則有守有邑則有宰固未嘗以郡守而兼攝乎邑令之政則城隍之神亦當尊卑相承以欽若乎帝天之命不宜獨以郡而攝乎邑也且如外邑惟龍江常開其冥司亦未必統於府城隍矣乃皆各自立廟

七句姚志刪

西安爲五邑之首顧不得專立一廟以祀城隍而使昔日受封之神久抑於冥冥豈非闕典乎是以積歲以來天運人從時至事起在民間有復舊之思在官府有更新之舉尋其故址廣以新規前邑大夫靜齋□公捐俸主緣董成其務今大夫邛洲□公躬行祭告神亦歆享歷有昭報不減昔日五鳳之盛實惟氣數之復興而神亦將以大庇乎斯民也嘗聞塑像之日閩商張孚禮泊舟於江山清湖夜夢神人盛陳騶

從旗旄前導曰西安城隍受命之任也孚禮驚愕至邑謁廟竦息驚歎儼然夢中見也此無心之夢顯其靈於斯人非偶然也

閩商一段姚志刪

舊紀仁祐伯生於漢武帝元狩

二年庚申三月初十日辰時夫人裴氏生於元鼎元年七月初七日申時神之靈祐

於民愈久而不忘也如此

此下姚志刪

廟成其地爲醋坊巷面南址北前有廳後有堂塑

像其上中參兩相西有巷達縣治□□約距十餘丈許予今得告與鄉耆德釐正舊

典以接祀事用序顛末以傳永久凡與事者附勒碑陰

峕

大明隆慶五年辛未仲春上浣之吉

賜進士第中憲大夫太僕寺卿前吏科都給事中郡人□□鄭大經撰

右列下方

按此記姚志刪節過半

明萬曆西安縣城隍廟上梁文

碑在戲臺下壁間

伏以君師之德大哉神實如君之治如師之教父母之恩深矣神實有父之嚴有母之慈雖怪力亂神聖人均所不語乃齋明盛服祭祀有所必承良以功德著於生前士民並受其福況乃顯道彰於身後今古歷蒙其庥不可掩夫惟其誠耳非此族也將誰祀之恭維西邑城隍之神呂爲甫侯降自崧嶽道惟正直著於信安漢廷五鳳三年特崇仁祐之謚宋室紹定元載嗣加積慶之封仁祐本於仁心心種爲千秋不朽之種積慶由於積善善根爲萬載不拔之根卽彼大地山河咸是妙明中物矧茲三衢首邑只是故鄉中人吾土舊居原有比閭族黨之誼後生小子儼如屬毛離裏之親肅時雨乂時暘默劑調而不過晴虞旱水虞潦有疾痛而必呼豪傑遞興思若啓而行若翼魑魅遠遜蠲不潔而滌不祥日用飲食者民風乎神之弔矣終和且平者世運也神實聽之能平九州祀以爲社能殖百穀祀以爲稷惟神在後可比其功太守不有歸之天子造物不德歸之太空惟神就中實贊其烈積慶仁祐之榮號洵爲不誣夫人裴氏之佐猷亦自難泯功德盛矣豈容日用而不知廟貌頽然徒令瞻

仰而興歎日祭月祀雖不忘夫載牲隘巷側階止可容乎旋馬街衢父老扼腕而悲
饗序名儒掉臂而起俞公邑宰可士民之陳言鄉紳諸君助建豎之物力飛簷迎日
喜閭闔之天開高棟凌雲快旌旗之風動金容巍聳就如日而望如雲玉砌坦平裨
成帷而汗成雨室內橫肱而不迫堂上布武而有餘萬目樂觀咸曰博也厚也高也
明也千人齊拜不知足之蹈之手之舞之猗與休哉是皆衆力之共舉揆厥所自實
乃神運以默成昔者辛未塑神像之時曾有閩商張孚禮之夢奇已徵於往日事更
異於而今伐樹而衆欲施於淫祠雷轟白石載木而衆方愁於水涸雨足大川初止
謂幽神之處冥若覺若夢今始信活佛之在世如見如聞市井愚民心裂膽破里鄰
昧客魄動魂飛三衢衆民覩落成而拭目兩儀後學喜新構而快心值壬子之辰正
上梁之日神人共樂天地同春棟宇百尺之高尊神可憇廣廈萬間之庇吾輩胥沾
肅載牲牷殊慚肥腍祇陳酒醴有愧馨香伏望俯念衆生弘敷大造助當路之吏治
去大暑而來清風開後進之文瀾披青天而覩白日當大明一統之世正宜助吾道

而使之大明作孔子家廟之鄰更宜翼斯文而相乎孔子庶幾真儒輩出濟濟同七十子之英坐見文運大亨磊磊冠千萬人之首斯不止爲地方土穀之主亦復足爲文章性天之宗欲耕問奴欲織問婢大衆所期望者或在乎他與子言孝與臣言忠不肖所禱祈者專在乎此殫心控籲惟神鑒俞

邑人葉秉敬謹書

明萬曆丁巳十月望後六日立

明萬曆重建縣城隍廟山門記

存

城隍舊趾去今門塾約可數十武既湫隘□久欹漏欲頽矣會中倡義擴地得深十丈餘請於縉紳重開堂宇獨門制未備其跬步猶昔也寅陽先生從齊雲歸來謁廟自堂徂基胥土宇而定經制焉迺會叔氏連城進首事者而語之曰既改作矣何仍舊爲且後有餘基可以大展必使階前盈三丈地庶可多容車馬毋局一時淺近之謀妨千秋不朽之業衆莫不喜而誦於物力將若之何先生曰是無難余曩取材石